

ACTA DA SESIÓN ORDINARIA CELEBRADA POLA COMISIÓN INFORMATIVA PERMANENTE DE ECONOMÍA E FACENDA E ESPECIAL DE CONTAS, O DÍA 22 DE NOVEMBRO DE 2013 ÁS 13.30 HORAS.

Sendo as trece horas e trinta minutos (13.30 h.) do día 22 de novembro de 2013, reúnese en sesión ordinaria convocada ao efecto a Comisión Informativa Permanente de Economía e Facenda e Especial de Contas, coa asistencia das/os concelleiras /os que de seguido se indican.

Concelleiras/os asistentes:

Vocais:

Grupo municipal popular
Alfredo Taboada Alvelo

Grupo municipal socialista
José Manuel Miñones Conde
Francisco Villaverde Marcos

Concelleiras/os non adscritas/os
Xosé Anxo Doval Rey
María Dolores Fernández Álvarez
Manuel José Ferreiro Santiago

Presidente: Don Santiago V. Amor Barreiro

Secretaria: Dona Rosa Ana Prada Queipo.

Asiste o interventor **José Antonio Rueda de Valenzuela** e a tesoureira **María Belén Rodríguez Tourón**.

ORDE DO DÍA:

Punto primeiro.- Aprobación, se procede, de actas anteriores.

Toma a palabra a secretaria para dicir que con respecto á acta de 25 de outubro de 2013 que se somete a aprobación, había un erro en varios puntos nos que se dicía que se ditaminaba favorablemente, cando era desfavorablemente e que ese erro xa foi advertido, corrixido e comunicado.

Por unanimidade dos membros presentes se presta aprobación á acta de 25 de outubro de 2013.

Punto segundo.- Renuncia á delegación de competencias e inspección do imposto sobre actividades económicas, concedida ao Concello de Ames por Orde ministerial de 28 de decembro de 2001.

Intervén o **alcalde** para dicir que dende o ano 2001 o Concello de Ames asumiu as competencias en materia de inspección do imposto sobre actividades económicas e que en outubro de 2012 o Concello delegou na Deputación da Coruña a xestión dos tributos. Actualmente o Ministerio informa que se se desexa delegar esta materia na Deputación debe existir unha renuncia unha expresa do Pleno da Corporación a competencia asumida no seu día.

Tras un breve cambio de impresións o asunto é ditaminado favorablemente por maioría simple co voto a favor dos membros do grupo municipal popular e a abstención do resto dos asistentes á Comisión informativa.

Punto terceiro.- Modificación da base de execución do orzamento núm. 41, para que esta contemple unha achega nominativa a favor de Arcea Adames para o financiamento dun taller de habilidades sociais.

Intervén o **alcalde** para dicir que os seguintes catro puntos son a modificación da base de execución do orzamento núm. 41 para contemplar unhas achegas nominativas a favor de catro entidades para os fins que figuran no expediente.

Toma a palabra o interventor, **José Antonio Rueda de Valenzuela**, para puntualizar que non se están concedendo as subvencións, senón que se están establecendo os requisitos para que despois se podan conceder. Que as subvencións que se conceden nominativamente, á marxe da convocatoria pública teñen que estar previstas nos orzamentos, o habitual é a través das

bases de execución. No orzamento do ano pasado contemplábanse tres destas, a de Arcea Adames, a do Motoclub e a de AEMI, o que ocorre é que estaba moi delimitado o obxecto. No caso de Cáritas estaba prevista Cáritas diocesana do Milladoiro e aínda que o proxecto é similar, neste caso é Cáritas de Bertamiráns.

Intervén **Xosé Anxo Doval Rey** para preguntar por un informe do interventor que figura no expediente. Contesta o **interventor** que o informe ao que el se refire é o de AEMI, no que se firmou un convenio subvencionador con carácter previo á celebración da actividade, que é o único que ten documentación formalizada, no resto dos casos está por formalizar. Continúa dicindo que tiña unha cláusula suspensiva que dicía que todos os compromisos do Concello quedarán condicionados a que o Pleno, a través dun acordo como este, lle dea o visto bo. Isto sería a fiscalización favorable a aquilo que se fixo no seu momento pero hai un informe da semana pasada que aborda a modificación da base de execución.

Intervén novamente **Xosé Anxo Doval Rey** para preguntar por que un convenio e non un contrato, ao que contesta o **interventor** que esta subvención é convenio subvencionador e que a diferenza é que nun contrato o Concello está adquirindo unha prestación a cambio dunha cantidade e neste caso estanse dando cartos para que unha asociación faga unha actividade.

Continúa a súa intervención **Xosé Anxo Doval Rey** expoñendo que se estivera o orzamento aprobado isto non viría aquí, que se trata de suplir o feito de que non hai orzamento, moi demandado en todos os plenos. Por último pregunta cal sería mais ou menos o prazo que terían estas asociacións para que puideran cobrar, se isto finalmente ten o visto bo do pleno, ao que contesta o **interventor** dicindo que a modificación do orzamento ten o mesmo trámite que o orzamentario, de xeito que calcula que contra o final de ano (aínda que se podería facer paralelamente tamén) habería que instruír os procedementos subvencionadores correspondentes para os tres que non o teñen feito, que son todas excepto AEMI. Terían que presentar os xustificantes precisos para que todo quedara formalizado antes do remate do ano. A partir de aí e cando se paguen xa é cuestión de Tesouraría.

Intervén a tesoureira, **Belén Rodríguez Tourón**, dicindo substancialmente que depende do que se aprobe antes de fin de ano porque se está pagando por orde de aprobación e hoxe mesmo estanse pagando os decretos aprobados na primeira semana de outubro, polo que se todo segue mais ou menos igual e tendo en conta que o final de ano sempre é moito mais complicado, podería ser no mes de febreiro.

Intervén novamente **Xosé Anxo Doval Rey** para dicir substancialmente que debería haber unha normativa ao respecto da concesión de achegas, sexan do tipo que sexan. Estas catro entidades, nas cales está de acordo en que hai que axudalas, son privilexiadas con respecto a outras. Co que tampouco están de acordo é que pola vía da modificación do orzamento o goberno pretenda solucionar os problemas da falta dun orzamento.

Intervén **María Dolores Fernández Álvarez** preguntando se se poden modificar as cantidades, dado que ve que algunhas delas polo menos son maiores que o ano pasado, ao que contesta o **interventor** dicindo que é o que solicitaron, pero que en todo caso si que se poderían modificar.

Continúa **María Dolores Fernández Álvarez** preguntando se esta modificación vai a ter permanencia no tempo, ao que contesta o **interventor** que se está modificando un orzamento que ten unha vixencia anual que remata o 31 de decembro e que o ano que ven se hai orzamento xa se poñerá e senón haberá que prorrogar novamente o do 2012, polo que nos atoparíamos na mesma situación que agora.

Continúa **María Dolores Fernández Álvarez** preguntando se se podería incluír a algunha outra entidade nesta fórmula, ao que contesta o **interventor** dicindo que dende o punto de vista técnico el informa, se a Corporación quere conceder nominativamente subvencións. A Lei de subvencións obriga a explicalo no Pleno e darlle suficiente publicidade, identificando ao destinatario nun documento público, como son as bases de execución do orzamento, todo isto previamente á concesión da subvención. Isto pódese facer sempre que haxa crédito orzamentario, non ten limitacións técnicas.

Intervén **José Miñones Conde** preguntando se non hai orzamento o ano que ven non habería subvencións nominativas, ao que responde o **interventor** dicindo que na base de execución 41

hai un cadro que establece beneficiarios e determinados proxectos que como non poden ser ambiguos cree que se refiren a actividades realizadas nun ano determinado e se se quere volver a dalas hai que aprobar o orzamento ou modificar a base de execución.

Pregunta **José Miñones** por que Cáritas Milladoiro non figura, ao que responde o **alcalde** dicindo que declinaron solicitar a subvención.

Tras un breve cambio de impresións o asunto é ditaminado favorablemente por maioría simple co voto a favor dos membros do grupo municipal popular e a abstención do resto dos asistentes á comisión informativa.

Punto cuarto.- Modificación da base de execución do orzamento núm. 41, para que esta contemple unha achega nominativa a favor de Motoclub Ameixenda, para o financiamento do proxecto Supercross Brins 2013 Gran premio Concello de Ames.

Tras un breve cambio de impresións o asunto é ditaminado favorablemente por maioría simple co voto a favor dos membros do grupo municipal popular e a abstención do resto dos asistentes á comisión informativa.

Punto quinto.- Modificación da base de execución do orzamento núm. 41, para que esta contemple unha achega nominativa a favor de Cáritas Diocesana Bertamiráns para o financiamento dun proxecto de inclusión social.

Tras un breve cambio de impresións o asunto é ditaminado favorablemente por maioría simple co voto a favor dos membros do grupo municipal popular e a abstención do resto dos asistentes á comisión informativa.

Punto sexto.- Modificación da base de execución do orzamento núm. 41, para que esta contemple unha achega nominativa a favor de AEMI para o financiamento da IX Feira do Comercio Val da Maía.

Tras un breve cambio de impresións o asunto é ditaminado favorablemente por maioría simple co voto a favor dos membros do grupo municipal popular e a abstención do resto dos asistentes á comisión informativa.

E non habendo mais asuntos de que tratar o señor presidente da por rematada a sesión ás trece horas e corenta e cinco minutos do día de referencia de todo o que eu como secretaria certifico.